



**PROGRAMA DE
MONITORIZASAUN SISTEMA
JUDISIAL**

AFIRMASAUN PÚBLIKU

Index: ASA 57/002/2012
3 Febreiru 2012

Timór Léste: Parlamentu Nasionál tenki hapara ignora sira-nia direitu

Ohin Amnesty International ho Programa de Monitorizasaun do Sistema Judisiál (JSMP) husu ba Parlamentu Nasionál atu fó konsiderasaun imediatamente kona-ba esbosu lei rua kona-ba medida atu fornese justisa ba sira ne'ebé sofre husi violasaun direítu umanu durante tinan 1975 to'o 1999.

Esbosu lei rua ne'ebé haruka tiha ona bá Parlamentu Nasionál iha fulan Juñu tinan 2010, buka atu estebalese programa reparasaun nasional ida no "Instituto Memoria Pùbliku". Esbosu lei sira ne'e fornese pontu importante sira atu komesa debate. Maski nune'e, lei rua ne'e presiza halo emendamentu signifikativu atu implementa vítima sira-nia direítu ba remédiu ne'ebé efetivu, inklui reparasaun kompletu tuir lei internasionál hateten.

Liu tiha fulan 18, Parlamentu Nasionál seidak debate kona-ba esbosu lei sira ne'e ka halo mudansa nesésariu. Parlamentu Nasionál planea tiha ona atu debate lei sira ne'e iha sesaun estraordináriu durante loran 1-3 fulan Febreiru. Maibé Parlamentu Nasionál kansela tiha ona debate ne'e atu fó prioridade ba diskusaun kona-ba esbosu lei pensaun parlamentár no lei ba rai. Desizaun ne'e hatudu katak Parlamentu Nasionál la halo kazu ka ignora tiha ne'ebé sofre husi violasaun direítu umanu sira.

Kontinuasaun falla atu debate, altera no pasa lei sira ne'e sei kontribui ba klima impunidade no injustisia iha Timór Léste. Ne'e hamosu pergunta sériu sira kona-ba governu no partidu polítiku sira-nia kompromisu atu asegura justisa, lia-loos no reparasaun ba krime kontra humanidade no violasaun direítu umanu seluk ne'ebe akontese durante okupasaun Indonézia nian.

Ida ne'e la aseitavel tanbá vítima no sira-nia família hein maizumenus tinan 12 - iha kazu barak mak, kleur liu ona.

Amnesty International no JSMP ejize ba Parlamentu Nasionál atu halo emendamentu esensial atu lori lei rua konsistente ho padraun internasionál. Emendamentu hirak ne'e inklui:

- ⑩ habelar âmbito konaba sé maka benefisiáriu tanbá agora 'benefisiáriu' inklui deit lista arbitráriu hosi 'vulnerável';
- ⑩ asegura katak formas reparasaun hotu-hotu bele disponivel ba vítima sira; no
- ⑩ fornese medida espesifiku atu asegura katak fetu sira bele iha asesu ba reparasaun, inklui atu kontra estigma no diskriminasaun ne'ebé violénsia seksuál sira hetan nomós dezafia estereótipu jeneru ne'ebé hamosu violénsia kontra fetu.

Amnesty International no JSMP mós husu Parlamentu Nasionál atu asegura katak Indonézia kumpre ninia responsabilidade tuir lei internasionál atu fornese reparasaun kompletu ba Timór-oan

sira ne'ebé sai sofre krime tuir internasionál no violasaun direitu umanu seluk ne'ebé ninia tropas no ajénte sira komete ona durante tinan 1975 to'o 1999.

Debate no pasa lei rua ne'e maka nu'udar pasu importante to'o ba implementasaun ba rekomendasaun sira husi Comissão de Acolhimento, Verdade e Reconciliação (CAVR) no Comissão bilateral da Verdade e Amizade (CVA). Tinan barak ona Organizasaun sociedade sivíl sira no sira iha Timór Leste ejize bebeik ona u justisa no reparasaun ba violasaun direitu umanu ne'ebé mak akontese durante okupasaun Indonézia nian.

Iha fulan Outuburu tinan 2011, prosesu Revizaun Universál Periódiku (UPR) avalia Timór Leste nia situasaun direitu umanu. Nasaun lima husu ba Timór Leste atu implementa rekomendasaun sira husi CAVR no CVA. Timór Leste hatán tiha ona atu konsidera rekomendasaun sira ne'e. Relatóriu UPR sei adopta iha fulan Marsu tinan 2012.

Iha ninia relatóriu foin daudaun ba Konsellu Seguransa ONU, Sekretáriu-Jerál Nasoins Unidas rekomenda atu Parlamentu Nasionál Timór Leste debate esbosu lei rua ne'e. Nomós, Sekretáriu-Jerál Nasoins Unidas haktuir katak progresu ka avansu ida liután mak implementasaun CAVR no CVA ninia rekomendasaun sira sei iha impaktu positivu ba dame no seguransa ne'ebé dura iha Timór Leste. Nune'é, iha fulan Dezembru tinan 2011, Grupu Servisu Nasoins Unidas kona-ba ema lakon, obriga ka halakon ema ho forsa, ne'ebé vizita tiha ona Timór Leste durante loron 7 to'o 14 fulan Feveireiru tinan 2011, no husu Parlamentu Nasionál atu debate no pasa lei rua ne'e.

Parlamentu nasional tenki hapara ignora vítima sira tanbá falla atu konsidera esbosu lei rua ne'e. Tenki asegura lei rua ne'e hodi debate didi'ak no halo emenda atu lao tuir lei internasionál no padraun internasionál no atu aprova urjentemente lei rua ne'e.

Atu hetan informasi klea'n liu tan favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Telefone: 3323883/7295795